

## Peqqussutissatut siunnersuummut oqaaseqaatit

**Oqaaseqaatit nalinginnaasut**1. Aallaqqaasiut:

Pisortanit ikiorsiissutit pillugit inatsisartut peqqussutaata allanngortinnissaanut inatsisartut peqqussutaannut siunnersuut saqqummiunneqarpoq § 6, imm. 2-p aamma § 13, imm. 4-p qallunaatuata kalaallisuuatalu assigiinngissuteqarnerat pissutigalugu.

§ 6-imi, imm. 2-mi qallunaatut oqaaseq: "opholdskommune" atorineqarpoq, § 6-illu imm. 2-ani kalaallisut oqaaseq: "kommuuni najugarivitaq"atorineqarluni. Paatsuugassaanninnissaa anguniarlugu qallunaatuani oqaaseq "opholdskommune" atorineqassasoq, kalaallisuuani "kommuni uninngavigisaq" atorineqassasoq siunnersuutigineqarpoq.

§ 13-ip, imm. 4-aani oqaasertat assigiinngitsut marluk ilanngussaapput. Siunnersuutigineqarpoq kalaallisuuani imm. 4-mi oqaasertat siulliit atorineqassasut. Oqaasertat siulliit taakku qallunaatuani § 13-ip, imm. 4-aani oqaasertanut naapertuupput.

§ 13, imm. 5-imi oqaaseqatigiit kingulliit nutaamik imm. 6-inngorlugit ilanngullugu siunnersuutigineqarpoq, pisortanit ikiorsiissutit annertussilerneqarnerannut atatillugu meeqqat pisariaqartitaasa immikkut isiginiartariaqarnerat kommunalbestyrelsit pisussaaffigigaat, aalajangersakkamut nammineq pisuussutigisamik pisariaqavissumik ikiorserneqartariaqalernermut kukkusumik inissinneqarsimammat. Siunertaavoq pisariaqavissumik pisortanit ikiorsiissutit annertussilerneqarneranni meeqqat pisariaqartitaat tamatigut isiginiarneqartarnissaat.

-

2. Aningaasaqarnikkut allaffissornikkullu kingunerisassai:

Allannguutissatut siunnersuut aningaasaqarnikkut allaffissornikkullu kinguneqassangilaq.

-

3. Oqartussanik aamma suliniaqatigiiffinnik allanillu tusarniaaviginnineq:

Allannguutissatut siunnersuut Naalakkersuisut Inatsisinut allaffeqarfianni (Lovkontor) misissorneqarpoq.

**Siunnersuutip aalajangersagaanut oqaaseqaatit**

*§ 1-imut*

Nr. 1 aamma 2

Siusinnerusukkut oqaaseqaatit innersuussutigineqarput, taamaattorli malugeqquneqarluni oqaasertaasa allannguuteqarneri.

Nr. 3-mut tunngatillugu.

Siunnersuummi ingerlateqqinneqarpoq maannakkut aalajangersagaq, qinnuteqartoq nammineq pisuussutigisaminik pissaaleqilersimappat, taava qinnuteqartoq taamaallaat pisortanit ikiorsiissutisiassatut pisinnaasaraluata affaa pisortanit ikiorsiissutigineqarsinnaasoq.

Pissaaleqilerneq nammineq pisuussutigineqartutut isigineqartarpoq qinnuteqartoq nammineerluni suliffimminit soraarniuteqarsimappat imaluunniit pisuussutigisaminik soraarsitaasimappat, assersuutigalugu pissutissaqanngitsumik sulinngitsoorsimaneq pissutigalugu. Aningaasanngornagit ikiorsiissutit tunniunneqassapput qinnuteqartumut allattuganngorlugu, pisiniarfimmi naleqquttumi pisissutigineqarsinnaasumik. Aningaasartuutinut aalajangersimasunik akiliisitsiniartumut toqqaannartumik akilisiisoqartassaaq.

Nr. 4-mut tunngatillugu.

Taamatut pisoqartillugu kommunalbestyrelsip naliliinermini eqqarsaatigisussaavai meerartaasinnaasut pisariaqartitaasa suuneri. Meeqqat pisariaqartitaat atugarissaarnerallu tamatigit salliutinneqartassapput.

*§ 2-mut*

Siunnersuutigineqarpoq peqqussut ulloq 1. juli 2008-mi atuutilissasoq.